

PLÊF DI S. MARTIN VESCU  
RUALP E VAL  
33022 CJARGNE

## SALÛT AL VISCUL

Come cristian j soi content di saludâ chescj frutins che vuè e confermin chel impegno che i lor gjenitors e la glesie e an cjapât par lor cuant che fasevin ancjemò sisin in tal pangit. Cumò e son grancj e al è just che dêtin la lor peraule di oms, di front e glesie e al mont.

Sul cuadrut ur ai scrit lis peraulis dal Signor: j seis la lûs dal mont. Cirît di no distudâ mai il ferâl nè di vê une lûs come un lumin di muart. Us mandi come agnei tal mieç dai lôf. Se o sareis fedei al Signor, Lui us difindarâ simpri e dapardut. No steit a vê pore, mai.

Come predi j saludi il vescul Alfredo, ch'al è vignût in te nestre glesie, nestre e sô, perceche il vescul al è di cjase fra nô, e ancje se no lu vin ancjemò picjât in sacristie o su la puarte de glesie, lu vin indimen ogni dì te messe e lu vin tal cûr.

Il vescul, per nô al è il 'capo', per vualtris 'il paron', pe glesie il 'gjenerâl', pal venseli il 'pastor'. I vescui e son come i fasui: un pôs bogns e un pôs cul bau, e il lor bau al è di dâ simpri reson al pape ancje a damp de puare int. E chest, ostrighe, nol va ben!

Alfredo, per tant che lu cognos, al semèe un bon cristian, finore nol à contadis balis e al crôt in ce ch'al dîs. Al è zovin e al promet ben. Al è vignût cessù a dânus il Spirtu Sant. Il Signor al fevele in mil manieris. Une des tantis e jè la glesie, e, in te glesie, i momens plui grancj e son i sacraments: batîsim, cresime ecc.

La glesie catoliche e à dit, tal Consei, che i vescui e àn la demigjane dai Spirtu Sant e Alfredo al è vignût a dânus un tai par om, a ducj, par dânus un pôc di spirt e di grinte tal cjapâ il vanzeli sul serio. J ripet: la glesie e dîs che dome il pape e i vescui e àn il monopoli de veretât e dal Sognor. J sin contens di vê une guide e une sigurece, ancje se Diu nol è come la television taliane che trasmet dome se si pae e dome su doi canâi!

A non vuestri e gno e di un trop di predis cjargnei, mi permet di fâ al vescul une promesse: ogniculavolte Lui al alçarà la so vôs (come un mê fa in Svissare) par difindi lis pioris cuintri i grancj, i prepotens, i siors, i dionescj, i laris e i brigans, nô j sarin simpri al so flanc, a difindilu e a judâlu. Cuant che invessit, par disgracie, al ves di fâ leghe cun chei che nus frein, nus cjatarà cuintri cence remission.

Che il Signor j dêti salût, coragjo e sintiment!

Rualp e Val, 20 di otubar 1974

Il plevan  
(pre toni bellina)